

# BARAZA LA WAWAKILISHI ZANZIBAR

Simu Nam. + 255 24 2230602/1

Fax Nam. + 255 24 2230215

Tovuti: [www.zanzibarassembly.go.tz](http://www.zanzibarassembly.go.tz)



SANDUKU LA BARUA 902,  
ZANZIBAR

Barua Pepe: [zahore@zanlink.com](mailto:zahore@zanlink.com)

## HOTUBA YA MAONI YA KAMATI YA KUSIMAMIA OFISI ZA VIONGOZI WAKUU WA KITAIFA YA BARAZA LA WAWAKILISHI ZANZIBAR KUHUSU UTEKELEZAJI WA MAONI. USHAURI NA MAPENDEKEZO YALIYOTOLEWA NA KAMATI KATIKA MWAKA WA FEDHA 2021/2022 KWA OFISI YA RAIS, KATIBA, SHERIA, UTUMISHI NA UTAWALA BORA

**Mheshimiwa Spika**, kwa heshima kubwa naanza kwa kumshukuru Mwenyezi Mungu Mtukufu kwa kutujaalia uhai na afya njema ambavyo vimetuwezesha kukutana tena katika Baraza hili tukufu tayari kutekeleza majukumu yetu ya msingi kwa nchi yetu. Ninamuomba Mwenyezi Mungu Mtukufu azidi kutukirimu neema zake ambazo kwa hakika sote ni wahitaji kwake.

**Mheshimiwa Spika**, napenda pia kukushukuru na kukupongeza wewe pamoja na wasaidizi wako, Mhe. Naibu Spika pamoja na Wenyeviti wa Baraza kwa namna mnavyoliendesha Baraza kwa umahiri mkubwa, namuomba Mwenyezi Mungu awazidishie hekma na busara katika jukumu lenu la kutuongoza ili tuweze kutekeleza vyema wajibu wa chombo hiki.

**Mheshimiwa Spika**, nitakuwa mchoyo wa fadhila iwapo sitowashukuru Wajumbe wa Kamati ya Kusimamia Ofisi za Viongozi Wakuu wa Kitaifa kwa namna wanavyonipatia mashirikiano makubwa katika kutekeleza majukumu ya Kamati

yetu.

**Mheshimiwa Spika**, nachukua fursa hii kuwatambua Wajumbe hao kama ifuatavyo:

1.	Mhe. Machano Othman Said	Mwenyekiti
2.	Mhe. Mtumwa Peya Yussuf	Makamu Mwenyekiti
3.	Mhe. Salma Mussa Bilal	Mjumbe
4.	Mhe. Mohamed Mgaza Jecha	Mjumbe
5.	Mhe. Zaina Abdulla Salum	Mjumbe
6.	Mhe. Suleiman Makame Ali	Mjumbe
7.	Nd. Ali Alawy Ali	Katibu
8.	Nd. Mwanaisha Mohammed Kheir	Katibu
9.	Nd. Amina Abeid Hemed	Mkalimani

**Mheshimiwa Spika**, Kamati kwa kutumia Kanuni ya 107(3) inapewa jukumu la kufuatilia utekelezaji wa maoni na ushauri wa Kamati yaliyotolewa katika Ripoti ya Kamati ya mwaka uliotangulia. Ambapo kazi hii ilifanywa vyema kwa kipindi hiki kilichopita na bado Kamati inazidi kufuatilia utekelezaji wa maoni, ushauri na mapendekezo hayo kila inapoona nafaa kufanya hivyo.

**Mheshimiwa Spika**, kwa mujibu wa Kanuni ya 109(15) ya Kanuni za Baraza la Wawakilishi Zanzibar, imetoa fursa ya lazima kwa kila Kamati kutayarisha ripoti ya mwaka itakayowasilishwa katika kikao cha mwezi wa Februari cha Baraza la Wawakilishi Zanzibar kila mwaka.

**Mheshimiwa Spika**, aidha, Kanuni ya 109(17) ya Kanuni za Baraza, inaelezea kuwa kabla ya kuwasilishwa Barazani utekelezaji wa maoni na ushauri huo, Kamati inatakiwa kukaa na wizara husika kujadili utekelezaji huo unaojumuisha ushauri na mapendekezo ya Kamati kwa wizara na taasisi zake inazozifanyia kazi.

**Mheshimiwa Spika**, Hotuba hii inaelekeza kwa Wizara ya Nchi Ofisi ya Rais, Katiba, Sheria, Utumishi na Utawala Bora ambapo jumla ya maoni na ushauri 36

yaliyoagizwa na Kamati katika mwaka wa fedha 2021/2022 katika kuimarisha utekelezaji wa maagizo yake.

#### **UTEKELEZAJI WA MAAGIZO:**

**Mheshimiwa Spika**, Kamati imefarijika sana na inatoa shukurani zake za dhati kwa Ofisi ya Rais, Katiba, Sheria, Utumishi na Utawala Bora kwa jinsi walivyoweza kutekeleza vyema mapendekezo hayo hali inayoonesha ukomavu katika utekelezaji wake pamoja na jitihada njema za kuleta maendeleo nchini.

**Mheshimiwa Spika**, licha ya Wizara kutekeleza vyema maoni na ushauri uliotolewa na Kamati, kuna baadhi ya maoni na ushauri ambao Kamati imeitaka Wizara kufuatilia zaidi utekelezaji wa maoni hayo kwa kutoa maelekezo yafuatayo:

(a) Kamati inashauri kuandaa mradi maalumu wa kufanyia matengenezo majengo yote ya Mahakama za Unguja na Pemba.

Wizara ifuatilie na kuandika upya majibu ya utekelezaji wa agizo hili kwa kutaja maeneo ya Mahkama ambazo wanatarajia kuzijenga Unguja na Pemba kwa upana zaidi. Ambapo Kamati ilielezwa kwa kifupi kwamba Mahkama hizo zitajenga Kaskazini A, Kinyasini, Kondoe, Changaweni, na Mgogoni.

(b) Kamati imependekeza Wizara kuzingatia miundombinu ya majengo ya Mahakama watakazozijenga itakayowezesha kuwahudumia watoto wenye ulemavu kwa urahisi.

Kamati inaiomba Mahkama kuzingatia ushauri uliotolewa na Kamati ili kuwepusha usumbufu wa watu wenye ulemavu kila wanapofika katika Mahkama hizo.

(c) Kamati inaishauri Wizara kufanya jitihada za makusudi kujenga Mahakama ya

watoto waliochini ya miaka 16 kisiwani Pemba.

Kamati imeitaka Mahakama kuweka jitihada kwa watoto ambao hawajafikia umri wa miaka 16 ambao hawatakiwi kupelekwa chuo cha Mafunzo kwa kuharakisha ujenzi wa Chuo cha Mafunzo kwa watoto wanaokinzana na Sheria kwa upande wa Pemba.

(d) Kamati imependekeza Wizara kulichukulia hatua za haraka suala la upatikanaji wa Hatimiliki ya jengo na eneo la Mahakama Kuu, Tunguu.

Kamati inasisitiza kutafuta hatimiliki ya viwanja hivyo ili kuepusha migogoro ya mipaka yanayoweza kutokea hapo baadae hasa kutokana na kuwa maeneo hayo yamekuwa yanauhamiaji mkubwa wa watu hivi sasa.

(e) Kamati imeelezwa kuwepo mpango wa kufanyiwa ukarabati kwa jengo la Afisi ya Mkurugenzi wa Mashtaka walilopatiwa na Serikali katika Mahakama ya Wete.

Kamati imeishauri ofisi ya DPP kufanya tathmini upya ya ukarabari wa jengo la afisi ya Mkurugenzi wa Mashtaka Wilaya ya Wete, jengo ambalo wamepatiwa na Serikali kwa ajili ya kulifanyia ukarabati kwa matumizi yao. Aidha, Kamati imeona ni vyema kufikiria kujenga upya kuliko kufanya ukarabati wa jengo hili ambalo ni kongwe mno na halikidhi vigezo vya Ofisi ya Mwendesha Mashtaka.

(f) Kamati inaishauri Kamisheni ya Wakfu na Mali ya Amana kushirikiana na Ofisi ya Mufti Mkuu wa Zanzibar kutoa elimu ya mirathi kupitia miskiti hasa katika hotuba za Ijumaa.

Kamati imetoa msisitizo kwa Wizara kuhakikisha kuwa inaishajihisha jamii juu ya kutoa elimu hiyo kwakuwa tatizo la mirathi limekuwa endelevu katika jamii zetu na husababisha mpaka vifo visivyokusudiwa.

(g) Kamati inashauri pia kuwafuatilia wapangaji wote wa nyumba za Wakfu kwa ajili ya kupata tahmini halisi ya madeni ambayo wanadaiwa wapangaji hao.

Kamati imetoa msisitizo wa pendekezo hilo kwa kufanyia hesabu maalumu ya nyumba zote zenye wapangaji na hatimae kujua deni lililokuwepo na maendeleo yake katika ulipaji.

(h) Kamati imeshauri kuchukuliwa hatua za haraka za kuharakisha ujenzi wa Ofisi ya Mamlaka ya Kudhiti na Kupambana na Rushwa (ZAECA).

Kamati imetoa maoni hayo baada ya hatua iliyofikiwa ya upatikanaji wa jengo la ofisi hiyo ili kuepuka kubaki katika jengo la Wakala wa Majengo (ZBA) liliopo Kilimani Mkoa wa Mjini Magharibi.

**Mheshimiwa Spika**, naomba kuchukua fursa hii tena kuishukuru Wizara kwa mashirikiano yake inayoipa Kamati katika kutekeleza majukumu yake na kuomba kuzidisha mashirikiano hayo ili kuweza kufikia lengo la Serikali kuleta maendeleo nchini.

**Mheshimiwa Spika**, naomba kuwasilisha.

Ahsante,



(Mhe. Machano Othman Said),

*Mwenyekiti,*

*Kamati ya Kusimamia Ofisi za Viongozi Wakuu wa Kitaifa,*

**BARAZA LA WAWAKILISHI,**

**ZANZIBAR**